

續
禮
記
集
說

續禮記集說卷三十四

仁和杭世駿大宗撰

曾子問

孔子曰嫁女之家三夜不息燭思相離也取女之家三日不舉樂思嗣親也三月而廟見稱來婦也擇日而祭於禰成婦之義也

萬氏斯大曰三月廟見卽士昏禮所謂婦入三月然後祭行也謂行祭於高曾祖廟此指舅姑在者而言擇日而祭於禰卽士昏禮所謂舅姑既沒則婦入三月乃奠菜也鄭氏注昏禮三月祭行爲助祭而不指

爲廟見孔氏又因昏禮無見祖廟正文遂於此條疏
謂廟見祭禰只是一事然則舅姑在者高曾祖之廟
可以不見乎按下文云女未廟見而死不遷於祖不
祔於皇姑可見廟見非指祭禰何則祔必以昭穆孫
婦則必祔祖姑皇姑也生時未廟見故死不遷不祔
昏禮記三月然後祭行者乃行祭於高祖諱廟而以
婦見與此記三月廟見之交相發此謂士也若夫大
夫有始祖廟者則并見始祖廟也其或支子之小宗
止有禰廟若祖廟或未有廟者則已見於已所得祭
之廟而餘廟則統於宗子以見之也三月而見者歲

有四時之祭率三月一舉婦之廟見必依於時祭然婦入而遇時祭或一月而遇或二月三月而遇遠不過三月舉遠以包近故曰三月非必定於三月也廟見必依於時祭者時祭必有主婦薦豆且亞獻有諸婦助所娶而爲冢婦也舅存則從姑舅沒則姑老而婦卽爲主婦所娶而爲眾婦也亦必從姑若宗婦故必於時祭之先擇日行之而後可以與於祭其不卽於時祭見者祭禮煩廟見禮簡且祝辭難兼故於祭禘言擇日明不與時祭同日也廟見之禮若何卽儀禮三月奠菜之禮通之可也廟見亦擇日祭禘亦於

三月互見也廟見亦成婦義祭禰亦稱來婦亦互見也

胡氏紹安曰鄭注謂三月廟見是舅姑沒者以舅姑在廟故也然何以知非見祖廟耶 毛氏奇齡答曰廟見是死舅姑之禮名婦至之日舅姑爲主人以賓主禮見不以舅姑禮見也至質明而後脩進見之禮以成婦義名曰婦見若舅姑偕沒則伯叔氏爲主人已成昏矣至三月而可行祭然後脩進見之禮而見死舅姑於廟名曰廟見是婦見廟見兩名相通以爲昏禮之大節是以婿不親迎至昏後而見外舅外姑

亦仿此見以爲名謂之婿見是昏禮有三見名他無有也若是祖廟則婦至告廟婦入謁廟倘三月而舅姑沒者則隨夫祭廟何見之有 紹安又曰然則擇日而祭於禰是另行祭禮抑卽此見禮 毛氏奇齡答曰是另行祭禮然亦見卽是此見禮而孔氏誤疏合兩爲一遂致難解按婦見禮獻舅以棗栗獻姑以股脩而舅姑答婦而醴之此一事也旣而歸行盥饋禮或是當日或是明日婦以特豚合獻舅姑而舅姑又答婦而饗之此又一事也然總之成婦見禮也今舅姑旣沒則婦入三月乃奠菜奠菜者謂以筴菜卽

一筐菜也先獻舅後獻姑倣初喪稽顙之拜扱地奠
菜考周制婦人肅拜但膝地而身不少詘以手肅之
而此則孤地而置顙其間此猶之婦見之行笄獻禮
而情極慘者然固是廟見初事也乃擇日而祭於禰
夫然後行良饋之禮作廟見終事而婦義於以成焉
故曰成婦義也今儀禮本不備之書闕此一事而鄭
注不錯謂必祭成婦義也者猶之舅姑在時行盥饋
特豚於室此明作分解而孔疏謂祭於禰者卽指奠
菜爲言只此一事而禮文昧矣殊不知此加祭字與
奠菜奠字正奠祭之別雖此非大祭不過特豚魚腊

諸物與盥饋等然明有祭字而以一奠茶溷之可乎
紹安又曰廟見一大禮如此嚴毅宋儒不知何故改
作三日廟見致時俗不學公然以新婦廟見書之儀
帖不祥孰甚予鄉學者或偶一戒之而人終不信唯
毛尙書家以阻興獻太后廟見世宗惡之不許其家
行謁廟禮然今亦仍行如故夫欲改此禮則竟行杜
撰可見矣乃又襲見此字而以月作日似改似訛果
何意與 毛氏奇齡答曰此予所以有昏禮辨正之
作也然此禮行之頗久自宋司馬光好言禮而程氏
以杜撰出之至徽宗作政和禮堂堂以廟見一禮襍

入其中而元明至今遂不能正相傳嘉靖朝興獻太
后入宮璵璣以爲宜行廟見而尙書毛澄力爭不得
有太常丞葉清者取儀禮密奏以爲壽安邵太后在
宮豈可以行亡姑之禮以取不瑞世宗驚悔乃止是
苟明其說人未有不廢然者惜俗學之不諒也 姚
氏之駟曰徐伯魯云三月廟見爲有舅姑者言古人
娶婦次日見舅姑三月見祖廟祝辭稱某氏來婦是
也擇日而祭於禰以舅沒主入禰廟則於三月擇日
祭見以成婦供養盥饋之義此則何如 毛氏奇齡
答曰此皆無學之人附會庸俗以爲說者據云古人

娶婦次日見舅姑是已乃曰三月見祖廟則出自何書春秋哀姜以次日朝廟魯史譏之謂非本日也豈有三月始謁廟者宋儒禮極杜撰猶不敢遲至三月必改三月爲三日而徐君取昌言三月已怪極矣乃問其三月所出則又以祝辭稱某氏來婦爲證夫某氏來婦本儀禮士昏禮文明云舅姑旣沒則婦入三月乃奠菜而祝曰某氏來婦敢奠嘉菜於皇舅某子皇姑某氏今乃曰見祖廟詞曰有舅姑是本文尙未見而欲反舊義何不知量也魯思眞學人若此者吾願魯思勿觀也 姚氏之駟曰廟見奠菜與擇日祭

禰原是兩節孔疏強合作一節而勢又難合於是祖
宋說者仍以見祖禰祭分作兩事而紛紛起矣今有
襲徐說而又小變者謂昏禮雖云舅姑既沒婦入三
月乃奠菜然言奠菜不言廟見則奠菜或是代獻
筓饋豚之事故明著舅姑既沒四字非廟見也若廟
見則婦初入門既見舅姑斷無不見祖廟者鄭公子
先配後祖鍼子譏之豈見祖可忽乎若此者何以正
之廟見作見祖前答胡問極明毛氏奇齡答曰昏
禮奠菜不明言廟見然不明稱來婦乎來婦者言來
爲子婦列祖不得而當之且廟見文曰稱來婦也奠

菜文曰三月奠菜祝稱來婦則奠菜卽廟見也來婦可据也然且廟見曰三月奠菜亦曰三月雖甚魯鈍亦必於此通一隙矣若曰新婦必見祖則誰云不見祖者特非三月耳據引鄭公子先配後祖而鍼于譏之則鄭忽迎婦於陳而陳使鍼子來送此當日事也乃引之以證三月試問此先配後祖是三月後乎抑非乎

姚氏際恆曰三月而廟見四句孔氏曰舅姑旣沒昏夕同牢禮畢三月乃奠菜於舅姑之廟故昏禮云舅姑旣沒則婦入三月乃奠菜是也昏禮奠菜之後更

無祭舅姑之事此云祭於禰者蓋謂奠菜也則廟見
奠菜祭禰是一事也按孔此說本是但本文四句似
乎重複尙有所未詳故後儒多疑爲兩事不知士昏
禮舅姑沒則三月廟見是廟見祭禰下云女未廟見
亦同其必云擇日而祭禰者蓋謂時至三月又須卜
日也如此則本文不爲之重複可免紛紛之有疑議
矣

朱氏軾曰三月廟見則祖禰俱見矣又擇日奠菜於
禰舅姑云存者見訖以特豚盥饋婦主養故曰成婦
謂如是而後婦之道完備也士昏禮若舅姑旣沒則

婦入三月乃奠菜又記云婦入三月然後祭行祭行
卽廟見也朱子經傳通解敘此記於舅姑旣沒之前
以三月廟見後若舅姑沒者則又奠菜於禰文義最
明鄭孔以祭行爲吉祭以廟見奠菜爲一事則是舅
姑存者竟無廟見之禮矣何其謬也在左傳鄭公子
忽如陳逆婦先配後祖陳鍼子曰是不爲夫婦誣其
祖矣夫曰後祖則是廟見非徒見禰矣且必先祖而
後配則是婦至未同年而先廟見矣或云祖謂告而
後親迎非廟見也

陸氏奎勳曰孔子謂孤子當室者其禮宜然故下文

曰三月而廟見稱來婦也若舅姑存者則明日婦執棗栗服脩見於舅姑矣郊特牲乃云昏禮不用樂是以變禮爲常禮也而後世皆沿其訛余於詩學及春秋義存錄皆詳辨之

姜氏兆錫曰思相離則不能寢寐故不滅燭思嗣親則不無傷感故不舉樂此昏禮所以不賀也婦人謂嫁曰歸故稱來婦舅姑存厥明婦見舅姑沒則三月見於廟而祝詞告曰某氏來爲婦也擇日而祭謂三月之內擇吉廟見以祭非廟見後更擇祭也成婦義者成婦禮盟饋之義

方氏苞曰舅姑以婦見於祖廟則祝辭稱來婦蓋舅姑稱之無舅姑則三月後夫婦擇日而祭於禰然後偏見於祖廟庾氏云若舅姑偏存則厥明盥饋如常不復廟見非也存者致養而不禮於亡者可乎若舅沒姑存則春秋時享子婦宜存之卽姑沒舅存鉶簋豆遵亦舍婦無供也如時祭當廟見之期則先擇日廟見而後共祀事如廟見期遠則宜供具而使室老或佐食攝薦焉以俟廟見蓋未有不廟見而遵承祀焉者也

曾子問曰女未廟見而死則如之何孔子曰不遷於祖

不耐於皇姑婿不杖不菲不次歸葬於女氏之黨示未
成婦也

見賢遍切
非扶味切

姚氏際恆曰此釋上義然亦疑其過歸葬女氏之黨
尤過雖曰成婦爲大此未成婦但其牢合娶妻道已
成生而迎之死而歸之可乎

朱氏軾曰不遷於祖不耐於姑是也夫旣爲服期矣
猶以未爲婦而歸葬何也古人族葬以昭穆合葬則
未爲婦以中殤之位葬之則又不可故歸葬焉然與
其歸也毋寧以中殤之位葬必曰未成婦而出其尸
忍矣且何以處婦之無所歸者

姜氏兆錫曰不遷於祖不遷柩而朝於祖廟也不耐於皇姑不耐主而列於姑次也婿服齊衰期而不杖且不著草屨不居哀次而女則歸葬於女氏之黨凡以未廟見則未成婦故也

李氏光坡曰歸葬於女氏之黨仍其女家之王母夫家不祀之也詳見襍記上女子耐於王母則不配注中甚矣鄭子之密也

方氏苞曰未婚而女死尙爲之齊衰旣葬而後除則未廟見齊衰以終喪可知也

任氏啟運曰古者族葬之法以左右爲昭穆葬必以

昭穆與祔廟之法同生未廟見則死不得祔廟故亦不得祔葬而歸葬於女氏之黨也今族葬之法不行則夫卜地葬之其可孔氏曰女之父母自降服大功以非在家且婿服齊衰非無主也

曾子問曰取女有吉日而女死如之何孔子曰婿齊衰而弔既葬而除之夫死亦如之

徐氏師曾曰齊衰而弔義之重也既葬而除情之輕也

姚氏際恆曰夫死亦如之鄭氏補斬衰亦是但本文與注皆不言除服後若何夫男除服後自應再取矣

女旣斬衰而弔於夫家可歸而再適乎後世雖有未
嫁夫死終身不適人者甚至有往殉於夫家者然此
等節烈至行人所難爲之事聖人亦祇任人自爲初
不以是立教也今記文必云夫死亦如之鄭又爲之
實其事曰女服斬衰則其後若何此處當酌

朱氏軾曰婦人不出疆而弔人今婿死而弔也與哉
婦哭其夫也旣服其服而哭之矣是未亡人也旣葬
可輒除乎除而嫁可謂貞乎在塗爲婦在室爲女雖
有吉日尙未爲婚姻也女死壻弔不失爲厚夫死女
弔則古禮之迂而無當者矣

姜氏兆錫曰亦如之者女以斬衰往弔既葬而除其服不同而節同也注曰既葬而除未有期與三年之恩故也

李氏光坡曰此禮可謂仁至雖有義夫貞女有本服以寄其哀有數月以盡其禮則知循禮之爲是且曰既葬除之蓋未恩深而禮有終則自知輕死之爲過情矣

方氏苞曰女宜斬衰而不弔期而後除泣而無聲任氏啟運曰昏禮納徵始定夫婦之約則未納徵不弔無服可也既納徵則婿齊衰而弔反而除之可也

既請期則彌親矣故既葬而除然其弔也亦必父命之乃親往其服也亦必於女家之外次若在女家則一聽於父可耳朱氏軾云婦人不越疆而弔人況於女子斬衰親弔此古禮之迂而無當者按此鄭氏互推之而知其然本文不言斬不言親也坊記言親迎女之父母承子以授婿儀禮言親迎父親醮子而命之曰往迎爾相承我宗嗣則未親迎不特未親受之女之父母并未受父親迎之命也且如三月未廟見猶曰未成婦烏有甫請期而男親與女女親哭男若成婦者乎則必使人弔而稱父也然明儒於女未嫁

而守節者斥爲專以身許人則不然男未取女未嫁
總聽命於父耳前之納徵而受請期而諧非父命乎
則改許他族亦父有二命女固守初命不從後命耳
不得目之爲專也大約聖人制禮爲可通也爲可久
也男可再取女無再嫁非寬於男刻於女男取以奉
父母承宗嗣必不可缺女則從一而終耳故唯父所
命者禮之通固守初命者女之貞微箕侯於周服夷
齊抗節西山亦各行其志也故論理當放平考禮須
參互觀男女有吉日而死尙相爲齊則知無使人請
而男別取女別嫁之理旣嫁未廟見猶曰未成婦則

知無死父命而親相弔哭成服之理亦無昏禮不復初爲不見舅姑不廟見終身不成婦之禮也

曾子問曰喪有二孤廟有二主禮與孔子曰天無二日土無二王嘗禘郊社尊無二上未知其爲禮也

姜氏兆錫曰上猶尊也嘗禘郊社其尊之無二上猶天之日土之王也此以明廟無二主之意而喪之無二孤不待言矣

任氏啟運曰禮唯適長主喪諸子不拜賓不送賓今世眾子皆拜非禮也且四三孤也唯天子諸侯繼世稱孤春秋大夫繼世稱孤偕也非禮也今世非繼世

而稱孤尤非禮也

昔者齊桓公亟舉兵作僞主以行及反藏諸祖廟廟有二主自桓公始也

姜氏兆錫曰此以下明二主二孤之由也亟數也禮師行載遷主以示尊奉今不用遷主而作僞主又藏於廟是二主也

方氏苞曰木主而曰僞何也送形而往迎精而反作虞主以蒞几筵及練易栗主以依先祖孝子之精誠結聚於是則亡者之靈爽亦憑焉祀於廟而藏於祔多厯年所而更作一主非僞而何

喪之二孤則昔者衛靈公適魯遭季桓子之喪衛君請
弔哀公辭不得命公爲主客入弔康子立於門右北面
公揖讓升自東階西鄉客升自西階弔公拜興哭康子
拜稽顙於位有司弗辨也今之二孤自季康子之過也
毛氏奇齡曰春秋靈公無適魯之事且哀二年經書
衛侯元卒卽靈公也至三年而後書季孫斯卒卽季
桓子也然則靈公之死在季桓子前矣或曰季桓子
之喪不必桓喪或是桓子爲喪主耳若然則是時死
者當是季平子考季平之死在定公年此時哀公未
立也且桓子旣主喪安得康子復爲主稽顙就位據

云二孤謂哀公與康子也若桓子爲主不三孤乎

姚氏際恆曰鄭氏以康子拜稽顙爲非當哭踊其說未然豈有客弔而主人不拜稽顙者況鄰國之君子當云哀公不當哭康子當哭踊庶可 按衛靈公以魯哀公二年先季桓子卒不應有此事鄭氏改爲衛出公並無稽

陸氏奎勳曰哀公與康子後孔子而卒此條皆稱其諡當屬門人記錄之書

姜氏兆錫曰公爲主者國君弔鄰國之臣尊卑不等故哀公主之也禮大夫旣殯而君來弔主人門右北

面哭拜稽顙今哀公既爲主拜賓康子但哭踊而已
乃拜稽顙於位而有司不能辨正是二孤矣豈非過
乎言過而不言始者康子爲孔子同時故也靈公先
桓子卒注謂當爲出公蓋謫矣

方氏苞曰注未明有司宜辨者何事唐宋諸儒皆謂
哀公爲主禮也且既拜賓季孫不宜更拜誤矣古者
國君雖有親弔士大夫之禮然不過始至升階而哭
既斂當心而馮奠設要節而踊未聞有拜禮也弔與
燕饗義異燕拜禮臣拜稽首而君答焉可也弔則尸
柩偃然於堂而受君之拜死者之心安乎衛侯之弔

卽固辭不獲命有司宜陳君臨臣喪之禮有哭踊而無拜俾公與衛侯立於堂上而季孫拜於階下季孫雖橫亦無以奪之也衛侯屈體於鄰國之權臣哀公不能自強而下同於季氏之孤天澤易位乃人紀莫大之變當時有司畏季氏而不敢正後儒轉以公之答拜爲禮真不可解也

曾子問曰古者師行必以遷廟主行乎孔子曰天子巡守以遷廟主行載於齊車言必有尊也今也取七廟之主以行則失之矣

姜氏兆錫曰遷廟主謂毀廟之主也君行則師從言

巡守而師征且其中矣金路謂之齊車上章言軍立
僞主之非此又言軍用七廟主之非也

方氏苞曰遷廟之主無時祭故可載以行巡守而載
主於齊車舍於諸侯之祖廟皆所以止邪於未形起
教於微渺也

齊氏召南曰按小宗伯職若大師則率有司而立軍
社奉主車注引此經主車卽遷主齊車也

續禮記集說卷三十四

浙江書局刊

金承廷校

王拱辰校

鄒寶德校

續禮記集說卷三十五

仁和杭世駿大宗撰

曾子問

當七廟五廟無虛主虛主者唯天子崩諸侯薨與去其國與祫祭于祖爲無主耳吾聞諸老聃曰天子崩諸侯薨則祝取羣廟之主而藏諸祖廟禮也卒哭成事而後主各反其廟君去其國大宰取羣廟之主以從禮也祫祭于祖則祝迎四廟之主主出廟入廟必蹕老聃云萬氏斯大曰祫祭卽王制所謂祫禘祫嘗祫烝之祫也合祭于太祖之廟故曰祫祭于祖廟謂別有祫祭

者非

姚氏際恆曰鄭氏曰老聃古壽考者之號石梁王氏曰此老聃非作五千言者按莊子載孔子與老聃問對之語史老莊傳云姓李名耳諡聃然則皆非與此皆欲爲記文蓋護而爲此語耳並可恨

姜氏兆錫曰此申上文之意也羣廟之主通謂天子七廟之三昭三穆諸侯五廟之二昭二穆也上文取主止言天子之七廟此迎主止言諸侯之四廟互文耳主皆藏祖廟以喪三年不祭且象生者爲凶事而集也此無主一也主皆從其君者不敢棄先祖以去

也此無主二也迎主以入廟且出入必蹕者以合食
爲大禮也此無主三也無主唯三者爲然則師行不
得以未遷之主明矣老聃孔子問禮者故引其言而
申結之

方氏苞曰此非周公典禮蓋周衰國滅而君奔者有
此記者因及之若爲天子所放流則宗祏不患無主
卽以內難出奔國中亦當改立君不應取主以行也
曾子問曰古者師行無遷主則何主孔子曰主命問曰
何謂也孔子曰天子諸侯將出必以幣帛皮圭告于祖
禰遂奉以出載以齊車以行每舍奠焉而后就舍反必

告設奠卒斂幣玉藏諸兩階之間乃出蓋貴命也

朱氏申曰貴命以祖禰之命爲貴也奉祖禰之命爲主見齊桓之作僞主非也天子出謂巡守諸侯出則見天子與諸侯相見也載幣帛所以代遷主

黃氏震曰主命者主在廟而受其命以行不以主行也

姜氏兆錫曰旣以幣玉告于在廟之主則奉此幣玉猶奉主之命也每舍必奠神之也反則告廟埋藏而乃出于廟亦不敢褻之意也

子游問曰喪慈母如母禮與孔子曰非禮也古者男子

外有傳內有慈母君命所使教子也何服之有昔者魯昭公少喪其母有慈母良及其死也公弗忍也欲喪之有司以閏曰古之禮慈母無服今也君爲之服是逆古之禮而亂國法也若將行之則有司將書之以遺後世無乃不可乎公曰古者天子練冠以燕居公弗忍也遂練冠以喪慈母喪慈母自魯昭公始也

吳氏澄曰慈母有二其一有服者大夫士之子無母父使庶母之無子者以爲子儀禮喪服傳齊衰三年章所稱慈母如母亦齊衰三年也若小功章云爲庶母慈已者但名爲庶母慈已不名慈母者矣其一無

服者國君子生擇諸母使爲子師其次爲慈母其次爲保母內則及此條孔子所稱者是也後世不審或執喪慈母如母之文而施于君命所使教子之慈母則失矣故子游疑其禮而孔子特明君所使教子者而告之也

顧氏炎武曰慈母者何也子幼而母死養于父妾父卒爲之三年所以報其鞠育之恩也然而必待父命者此又先王嚴父而不敢自尊其報之義也父命妾曰女以爲子謂憐其無母視之如子長之育之非立之以爲妾後也喪服小記以爲慈母後則未可信也

毛氏奇齡曰春秋襄三十一年魯襄卒立齊嬀之子稠爲君是爲昭公時昭公十九歲左傳稱一十九年而有童心者卽史記世家亦然及立十一年而其母齊歸之薨始見于經所云夫人歸氏薨又云葬我小君齊歸皆是也是昭公喪母時已三十歲而謂少喪其母可乎

姚氏際恆曰按儀禮喪服齊衰三年章云慈母如母又小功章云君之子爲庶慈已者鄭氏引此二條以爲彼皆言大夫以下此子游與夫子問答皆言國君故無服不知天子諸侯絕期于庶母總庶母慈已者

小功固無服矣若慈母旣謂如母則父在期父卒三年國君亦絕乎則如父之義云何也卽曰不必如是之重服而昭公之欲喪亦非全不合禮者有司何至謂之逆禮亂法也可見此章之義與儀禮原自不同鄭氏爲之牽引證合反使兩處之義皆不能明亦何必然也郝仲輿以其難通解慈母爲外人婦則又武斷矣鄭氏曰昭公年三十乃喪齊歸又無戚容是不少又安能不忍于慈母此非昭公明矣未知何公也按鄭謂非昭公亦是又不強實以何公尤其是而孔氏据僞撰家語以爲孝公殊無謂此篇所言春秋之事

類多無稽如上章衛靈公弔季康于既非靈公亦非孝公此章既非昭公亦非孝公何必自爲紛擾乎大抵此章之說因昭公娶同姓爲不知禮故附會其不知禮之事如此耳

陸氏奎勳曰按昭公年三十乃喪齊歸記言乃漢儒之誤家語改孝公亦未有徵

姜氏兆錫曰如上臨川吳氏說又山陰陸氏曰男子外有保傅內有慈母君命所使教子也古者師弟子無服蓋如此愚按慈母所以差爲二等者以其分而言一則國君之子一則大夫之子崇與卑異也以其

恩而言一則使教其子一則命撫爲子淺與深又異也故其服制不同良善也禮慈母無服而昭公託練冠燕居之說以服之其違禮明矣况復喪慈母如母乎此又引以申上文之意也鄭註曰天子練冠以燕居蓋爲謂庶子王爲其生母也昭公年三十乃喪其母齊歸是不少且母喪無戚容又安能不忍于慈母乎其非昭公明矣未知何公也疏曰天子爲其母練冠經無明文鄭云蓋者疑辭乃異代之制也考家語孝公有慈母良是孝誤爲昭耳愚按父母之喪自天子下達期以下諸侯絕大夫降此所謂諸侯絕旁

期也況于君使教子之慈母乎若庶子生母之服則有不可一例言者禮子爲母齊衰三年父在則期此母爲父降無貴賤一也妾之子士以下其子爲其母如母大夫則父在爲其母服大功父卒亦三年諸侯以上則父在爲其母無服父卒爲之大功此庶爲嫡降貴與賤異也今本章所稱古者天子練冠以燕居初不言其生母鄭注疑其如此疏以其無明文而指爲異代之制似得矣然考儀禮喪服記文云公子爲其父練冠麻衣縗緣旣葬除之傳曰何以不在五服之中也君之所不服子亦不敢服也鄭註曰諸侯之

妾子厭于父不得伸權爲制此服不奪其恩也則此
練冠之制蓋公子于生母爲國君所厭之權服非言
國君自爲其生母更非言天子爲其生母也又攷儀
禮喪服大功章云公之庶昆弟爲其母大功傳曰先
君餘尊之所厭不得過大功也總麻章云庶子爲父
後者爲其母總傳曰與尊者爲一體不敢私其服親
也有死于宮中者則爲之三月不舉祭因是以服總
也然則諸侯之妾子父卒爲其母大功而其或爲父
後則唯服總也以此推之則庶子王乃天子之庶子
爲父後者而其于禮亦當用總之思正服衰經以服

之又豈有用五服以外父在厭抑而練冠緦緣之權制者哉夫親喪下達庶子之生母君在既厭于君比君卒又以餘尊厭而僅爲之大功其或爲君之後者又以喪者不祭而不敢服僅得緣死于宮中三月不舉祭者之例以伸其總則其情之爲禮抑者固已多矣而謂庶子王反逆禮而斬爲之總乎傳言母以子貴以父妾而尊爲夫人此公羊氏之說亂嫡妾之分禮之所不與也若注疏之臆詞而不爲之考辨是又滋禮之惑也然則公羊之所引者果何指也考記中凡引家語入記者多截去首尾如此條家語所載本

系前言行錄卷三十三
云古者天子喪慈母練冠以燕居則公固不免託于
古以文其過矣疏旣知以家語孝公辨注昭公之疑
而獨不以家語喪慈母辨爲其生母之惑何哉

李氏光坡曰此慈母乃內則擇于諸母使爲子師爲
慈母爲保母之慈母上注所云三年之慈母則是父
特命使爲母子者與此異也喪服傳自明

方氏苞曰左傳載魯昭公失禮事多季氏誣辭公于
慈母尙不忍而齊歸之喪三易衰如故衰時公又非
甚少誣可知矣蓋緣民不知君而唯季氏是德故信
其誣辭久而不能辨也

任氏啟運曰鄭注練冠以居庶子王爲其母孔疏母當以子貴以適小君在故壓屈此大繆也禮子爲齊衰三年父在爲母期此母爲父厭貴賤一也士以下妾子爲其母如母大夫父在爲其母大功父卒三年諸侯以上父在無服卒乃大功此妾爲嫡厭加以尊降貴賤異也儀禮喪服記公子爲其母練冠麻衣乃諸侯妾子爲君所厭之降服卽所謂齊服非國君立而爲生母之服蓋非庶子王而爲其生母也大功章公之庶昆弟爲其母大功傳曰先君餘尊之所壓不得過大功也總麻章庶子爲父後者爲其母總麻傳曰

與尊者爲體不敢服其私親也然則庶子王亦當用
總之正服而不得以君在尊厭之服服之明矣公羊
傳母以子貴若成風敬嬴皆禮所不與也而鄭孔以
意附會爲一禮外禮何居唐武氏始請父在爲母齊
衰三年不命大功明洪武怒懿文不爲庶母服詔生
母慈母皆斬衰三年適子爲庶母期以一時之溺愛
亂千古之大經講禮者所當亟正也

齊氏召南曰南史儒林傳梁武敕官禮議皇子慈母
之服司馬筠引此經及注云國君之子不服則王者
之子可知宜依禮刊除以反前代之惑小功不可云

行按梁武謂禮言慈母凡有三條一則妾子之無母
使妾之無子者養之命爲母子服三年喪服齊衰章
所言慈母如母是也二則嫡妻之子使妾養之慈母
撫隆至妾無爲母之義而恩深事重故服以小功喪
服小功章所以不直言慈母而云庶母慈已者明異
于三年之慈母也其三則子非無母正是擇賤者視
之義同師保而不無慈愛故亦有慈母之名師保旣
無服則此慈母亦無服矣內則云擇于諸母與可者
使爲子師其次爲慈母其次爲保母此其明文也子
游所問自是師保之慈母非三年小功之慈母也故

夫子得有此對豈非師保之慈母無服之證乎鄭不辨三年心慈混爲釋解

曾子問曰諸侯旅見天子入門不得終禮廢者幾孔子曰四請問之大廟火日食后之喪而霜服失容則廢如諸侯皆在而日食則從天子救日各以其方色與其兵大廟火則從天子救火不以方色與兵

見賢遍切幾居豈切大音泰

穀梁傳曰天子救日置五麾陳五兵五鼓諸侯三大夫擊門士擊柝

范氏甯曰日食天子伐鼓于社責上公諸侯伐鼓于朝自責也

朱氏軾曰火日食喪廢禮宜也雨何以廢當羣侯肆
覲五瑞畢集衮衣繡裳之章垂紳擗笏之度雨霑服
而失容烏乎成禮天子穆穆諸侯皇皇服飾儀容之
所關鉅矣與其失也何如廢霑服失容釋所以雨而
廢禮之故也各以其方色與其兵色謂衣色諸侯各
以其所居之方別其衣與兵也

陸氏奎勳曰鄭註兵未聞也隱義之說甚鑿穀梁云
天子救日置五麾陳五兵五鼓諸侯置三麾陳三鼓
三兵差爲近理

姜氏兆錫曰旅眾也方色注謂旗服之屬東方青南

方赤之類兵謂兵器隱義云東方戟南方矛西方弩
北方楯中央鼓也日食陰陽爭故正五行方色以厭
勝之火則救之而已

方氏苞曰如非朝覲之期諸侯不皆在則方色不備
雖從救止常服不以方色與兵也

齊氏召南曰日食預先可推而知古人得于其日行
朝會者以占術或未審故不爲預廢也

曾子問曰諸侯相見揖讓入門不得終禮廢者幾孔子
曰六請問之曰天子崩大廟火日食后夫人之喪雨雪
服失容則廢

徐氏師曾曰五事之廢無可疑矣獨日食之變可以預推何不更日而至中廢乎是可疑也

陳氏澍曰夫人兩君之小君

案諸侯以朝會來此國則彼國夫人卒誰主計

者以本國小君爲是

何氏瑾栗曰六字是五字之誤此與上章四廢祇增天子崩一事何爲六也注疏釋文俱闕

姚氏際恆曰此等問禮之事有之未嘗用無之未嘗闕

姜氏兆錫曰前太廟王朝之太廟此太廟本國之太廟也后夫人王后及諸侯夫人也此上二節言王侯

朝聘遭變之禮也

任氏啟運曰古歷法疏故有遇日食者今則可早推而豫避

曾子問曰天子嘗禘郊社五祀之祭簠簋既陳天子崩后之喪如之何孔子曰廢曾子問曰當祭而日食大廟火其祭也如之何孔子曰接祭而已矣如牲至未殺則廢

鄭氏康成曰接祭而已不迎尸也

孔疏迎尸有二祭初迎尸于奧行灌

禮灌畢迎牲尸外行朝踐禮及合烹迎尸入奧行饋熟禮此指陳饋熟也若郊社五祀無朝踐則納烹亦祭初也

馬氏晞孟曰大廟神之位也神有不安于道虧矣故
旅見與當祭皆廢而帥諸侯以救火古者宗廟火三
日哭所以謝神也日者陽之位陽有不明君道虧矣
古者日食瞽奏鼓鼙夫馳庶人走所以助陽也祭吉
事也朝盛事也天子廢朝亦廢祭然以旅見較祭則
祭重故雨露服失容可以不旅見而不可以不祭旅
見可以易日而祭不可以易日也

黃氏震曰接祭接續行事遇變而遽不暇舒徐也
張氏曰接祭使人接之以終事

萬氏斯大曰當祭而日食可承上章謂是嘗禘郊社

五祀之祭至大廟火止宜言是郊社五祀之祭不可
及嘗禘蓋嘗禘行于太廟如當嘗禘而大廟火則救
火不暇安能接祭乎

姚氏炳曰孔疏謂接捷也速也謂速而祭之按接捷
古字通春秋左穀鄭伯捷公羊作接漢書西域傳輪
臺以東捷枝渠犂皆故國註捷接同魏武記註集鈔
諸家兵法名曰接要卽捷要皆可證者鄭注解接祭
爲不迎尸此似贅語祭以牲爲主觀郊特牲有迎牲
用牲升首毛血祭肺肝心取腍膋諸文又必君再拜
稽首肉袒親割此非倉猝可辦者故謂牲已殺則速

祭未殺則廢祭尸之迎否勿論也今欲以迎尸之說解殺牲文則在前在後兩無可定豈其然乎

毛氏奇齡曰接捷引據最確但不迎尸正是解捷祭之法未嘗與殺牲有礙義也亦唯此時已殺牲一如所云升首瘞血祭肺肝取脅等煩重難速故以不迎尸速之若牲猶未殺則此祭遂廢何言不迎尸乎蓋不迎尸則方能捷祭一切出入登降酌獻醑養諸節概可減省斟酌故殺牲前後謂郊社五祀迎尸在殺牲後者則竟止不迎即禘嘗宗廟迎尸在殺牲前者亦迎不再迎如薦熟不出堂饋食不入室等此正說

禮之極細者何云贅乎

姚氏際恆曰此與曲禮皆云天子五祀鄭氏必主祭法七祀而云關中言之執禮解禮之謬也 又曰鄭

氏曰接祭而已

疏曰接捷也

不迎尸也非是郊特牲云既

灌然後迎牲則迎尸本在殺牲前今以接祭爲不迎尸下文云如牲至未殺則是殺牲在迎尸前矣孔氏曰迎尸有二祭初迎尸于奧行灌禮灌畢而後出迎牲行朝踐禮是一然後退而合官更迎尸入坐于奧行饋熟禮是二愚按鄭謂不迎尸者自謂祭初若退復迎尸入奧祭已將畢又何必言乎明是曲說陳可

大因謂接祭爲概無迎尸于奧及迎尸入坐等禮尤誤矣 又曰日食與火不同日食雖當救然亦不必廢祭也至于火其在太廟固無論矣卽在羣廟又豈可晏然而祭乎

姜氏兆錫曰此下二節言王祭遭變之禮也五祀月令中霽門行戶竈是也說見王制簠簋旣陳猶言當祭也天子崩謂暴崩也當祭承上文言嘗禘郊社五祀之祭也接之言連捷速之義日食大廟火較王后崩爲輕故牲殺之後遇變不廢惟務在速畢無繁縟節文耳舊謂其祭無迎尸入坐等禮是也然日食固

皆速祭而不廢若太廟火其郊社五祀速祭不廢可也
大廟中方當禘祫而火豈有復祭之理徐氏經解云
大廟火救火遷主爲急祭固當廢也以此而推子固約言以答之耳

李氏光坡曰五祀或勾芒等五官或戶竈五者而祭
法又言七祀其五與月令同唯多司命泰厲耳則司
命在神祀中耳而荀子曰郊則并百王于上而祭之
則泰厲存焉是周唯有五祀而七祀或儒者廣記異
代非可武斷也

任氏啟運曰祭必窮日之力卽疾必亦歷三四時日

食廟火不能待時也疑張氏得之若祭宗廟則太廟火亦廢

天子崩未殯五祀之祭不行既殯而祭其祭也尸入三飯不侑醕不酢而已矣自啟至于反哭五祀之祭不行已葬而祭祝畢獻而已

飯扶晚反下同醕音引又任觀反

黃氏乾行曰天子崩君薨凶變之至大臣子服斬衰三年者也社稷五祀特吉禮之輕者耳今舍其至大而行其至輕殯但殺禮葬卽漸加何與王制云喪三年不祭唯祭天地則社稷五祀不祭矣

姚氏際恆曰王制云喪三年不祭唯祭天地社稷爲

越紼而行事前儒已有疑之者今云天子崩既殯卽祭五祀但殺其禮何耶疏引鄭氏謂天地社稷去殯處遠則踰越此紼而往五祀去殯處近暫往則還故不爲越紼如其說則王制當云喪三年祭惟祭天地社稷爲越紼而行事矣甚矣執禮解禮之謬也

姜氏兆錫曰旣殯而祭謂自薨至殯不祭五祀直待殯後乃祭也不言嘗禘郊社者二年之喪嘗禘不行而天地社稷則旣殯之後未葬之前又自越紼行事無殺禮故也

任氏啟運曰天子唯祭天地越紼行事程子謂猶在

殯宮無由致齊縱天地之祭不可廢只消冢宰攝耳
今按此章言五祀祭不言嘗禘郊社則葬以前嘗禘
不行可知蓋天子九月而卒哭卒哭以前羣主皆聚
太廟不祭可知郊之祭國人喪者不哭不敢凶服豈
有天子未卒哭而郊者程子冢宰攝之之說本周禮
宗伯王不與祭則攝位但冢宰宗伯爲王斬衰后齊
衰恐未葬亦不可脫衰易祭服也蓋三年不祭是天
子正法卒哭後主各歸其廟而冢宰宗伯亦同功衰
于是特祀于主于親主之祭嘗禘于廟宗伯攝之祝
畢獻而已既練然後成祭猶不行旅醢不餼大祥無

無算爵天地之祭冢宰攝行亦無嘏酬諸禮五祀之祭大夫攝之耳呂氏云祭而誠至則忘哀誠不至不如不祭爲愈後世哀死不如古人之隆故多疑其論甚確然正唯其哀死不如古人之隆此祭之所以不可廢也可廢也

齊氏召南曰是周制五祀之明文何必執祭法爲準乎

曾子問曰諸侯之祭社稷俎豆旣陳聞天子崩后之喪君薨夫人之喪如之何孔子曰廢自薨比至于殯自啟至于反哭奉帥天子

黃氏震曰奉帥天子亦如天子之殺禮

陳氏澂曰諸侯既殯而祭社稷或五祀亦如天子殯後祭五祀之禮葬後而祭社稷五祀亦如天子葬後祭五祀之禮

姜氏兆錫曰此言侯祭遭變之禮也俎豆既陳猶上言簠簋既陳互文也君卽諸侯亦謂暴薨也比及也帥循也不言嘗禘郊及五祀者侯禮無郊祀大嘗禘但有社稷而已且言社稷則五祀從同也

曾子問曰大夫之祭鼎俎既陳籩豆既設不得成禮廢者幾孔子曰九請問之曰天子崩后之喪君薨夫人之

喪君之大廟火日食三年之喪齊衰大功皆廢外喪自齊衰以下行也其齊衰之祭也尸入三飯不侑醕不酢而已矣大功酢而已矣小功總室中之事而已矣士之所以異者總不祭所祭于死者無服則祭

皇氏侃曰從母雖于已小功于父則無服亦不廢祭熊氏安生曰從母雖于父無服在已則小功亦廢

姚氏際恆曰凡以上此等問答皆類瑣細迂僻鮮可見諸日用苟逆料未然之事以言禮天下事何可盡耶

方氏苞曰總不祭觀此條義乃明蓋必同宮然後廢

祭也知然者以外喪自齊衰以下行也諸侯之大夫服夫人期天王七月皆廢祭則外喪齊衰謂世父母叔父母兄弟不同宮者可知以同宮爲斷則祭之廢者寡矣禭記如同宮雖臣妾葬而後祭況總服乎所祭于死者無服則祭亦謂母妻之族或有故而與已同居者非然則旣曰外喪自齊衰以下行而復立此文亦贅甚矣門內大功廢祭者大夫之大功皆期之降也

任氏啟運曰公羊傳大夫祭聞君之喪攝主而往夫人之喪尸事畢而往則廢亦非不終其事也又按從

母小功亦祭

曾子問曰三年之喪弔乎孔子曰三年之喪練不羣立不旅行君子禮以飾情三年之喪而弔哭不亦虛乎

吳氏澄曰練一期之後同羣而立得厭而行恐與人相與而忘已之哀情也此且不可而況忘已親之哀而弔哭以哀人之親乎

陳氏澠曰曾子既聞此言而檀弓乃記其以喪母之齊衰哭于張得非好事者爲之辭與

姚氏際恆曰此說與檀弓有殯聞遠兄弟之喪雖總必往不合似檀弓是

朱氏軾曰虛謂弔哭非有實情徒爲虛文而已

曾子問曰大夫士有私喪可以除之矣而有君服焉其除之也如之何孔子曰有君喪服于身不敢私服又何除焉于是乎有過時而弗除也君之喪服除而后殷祭禮也

盧氏植曰殷祭盛也君服除乃行釋私服之禮

張氏曰私喪親喪也殷祭謂宗廟之盛祭

徐氏師曾曰必君服除而後行宗廟之殷祭則不復除喪之祭可知

姜氏兆錫曰因親喪而問君喪也殷祭謂祥祭也言

君服在身雖遭親喪不敢成服也始尙不成服矣況終行除服之禮乎此所以時過不除唯待君服旣除之後然後次月行小祥之祭又次月行大祥之祭也蓋義以斷恩而不復除親之服其禮如此

方氏苞曰注不得追祭唯適子爲庶人庶子仕則然若並仕則追祭二祥庶子以與無適庶子亦得自追二祥

曾子問曰父母之喪不除可乎孔子曰先王制禮過時弗舉禮也非勿能弗除也患其過于制也故君子過時不祭禮也

彭氏廉夫曰孔子語以過時弗除之變禮曾子隆于孝遂欲致其終身之憂故孔子又語以此禮之不可過若先所謂過時不除者乃厭于君尊不然則不可也君子加厚于親皆欲弗除患其過制焉耳

張氏曰過時不舉如除喪不改冠昏不反初小功不稅時祭不補之類皆是乃禮制之本然也

郝氏敬曰吉祭過時則不祭況喪服豈可過時所以除也

姚氏際恆曰鄭孔釋殷祭爲大小二祥釋過時不祭爲時祭按謂過時弗舉禮也統凡禮言之然則二祥

過時何以獨舉不可通矣徐氏集註用張氏之說曰

殷祭宗廟之盛祭必君服除而后行宗之殷祭謂不

復行除喪之祭也

徐伯魯曰鄭注君服除而後行二祥祭則與下節相戾然亦自知其

不通故以適子追祭支子不追祭爲言愚以經无明文故不敢從曾子因孔子殷祭

之言以不復有祥禫之祭故又問如此孔子答以先

王制禮各以其時若已過時則不追舉今此弗除父

母之喪者非弗能弗除也恐其踰禮制而不敢也再

言過時不祭爲禮以明弗除之爲不可也此說得記

文之意矣然愚以爲記文之義非也雖曰祥禫過時

其祭自不可不行否則父母之喪終身不除矣曾子

曰父母之喪弗除可乎此駁良是故曰記文之義非也記文之義非而鄭注之義則又是矣

姜氏兆錫曰舉之言行祭謂時祭也言先王制禮有節過時不復追行禮也今不追除服非緣不能而弗除也患踰制也且如春秋祭或以事廢至夏則惟行夏祭不復追舉春祭矣時祭之不追行如此若親喪之行殷祭而不追除服又何疑哉按親喪有殯之成服有祥之除服此禮也若有君喪而遭親喪則其時但舉親親之殯禮而不成服有親喪而遭君喪則其後但補親喪之祥祭而不除服此權也故親喪既

葬而遭君喪者其後遞補小祥大祥之祭既練而遭君喪者其後但補大祥之祭而皆不復行除服之禮此所以曾子問而孔子答之如此也所以然者除喪因祭而不舉也祭不爲除喪設也此喪服小記之義也故祭與除服爲二禮而此則祭而不除耳或乃誤以祥祭除喪爲一禮謂君服除而追祭唯嫡子之爲大夫士者行之若庶子爲大夫士則嫡子主行喪禮他日雖除君服而不追祭是終身不除親喪矣此曾子所以復問也夫合祭除爲一初非禮之本義且嫡子主祭則庶子從祭是卽祭矣何不祭之有以不明

祭除分合之禮遂失經義而并過時不祭之義亦曲而難通也其失豈淺鮮哉學者幸并體之

任氏啟運曰本文無庶子字且下過時亦不見爲四時之祭故不從

續禮記集說卷三十五

浙江書局刊

三

一〇八

浙江書局刊

金承誥校

許碩儒校

王家賢校